

Parlamentario Desiree de Sousa Croes:

Ta boga pa kita e obligacion di haci denuncia den caso di violencia domestico

“NOS leyman penal actual ta exihi cu ora tin violencia domestico, e victima (-nan) mester haci denuncia contra e persona(-nan) cu a comete e violencia, destruccion of abuso.

Sin un denuncia contra esun cu comete e violencia, Polis ni husticia por detene ni persigui e abusador. E delito di violencia domestico ta wordo considera un asina yama “klachtdelict”, unda ta laga e prerogativo pa haci denuncia na e victima”, segun Parlamentario Desiree Croes.

“Mucho hopi biaha, e victima ta di un of otro manera dependiente di e abusado.

Sea pa motibo di dependencia financiero of emocional, e victima ta nenga di haci denuncia contra e abusador. Asina aki e situacion indesea unda un señora y yiunan ta keda biba den violencia, miedo y infelicidad ta keda existi”, Parlamentario de Sousa-Croes a splica.

“Mas cu e señora como victima, ta pa henter e sociedad indesea cu yiunan menor di edad ta lanta den un ambiente di agresion cu hasta lo lanta pensa cu esaki ta normal.

Victimanan hoben di abuso, sigur ora no tin accion contra e abuso, ta lanta cu e pensamiento cu violencia como methodo pa caba cu un discusion ta aceptabel y hasta eficiente.

Asina nan lo por haci na grandi, loke nan a mira como mucha ya cu nan a mira cu no tin castigo. Tanten cu bo por convence e victima pa no haci denuncia, sea cu palabra bunita of menasa, bo ta keda sin haya castigo”, e Parlamentario a duna di conoce.

“Esaki ta un situacion cu Parlamento di Aruba kier mira cambia: Polis y husticia mester por actua SIN cu tin un denuncia haci dor di e victima contra esnan cu ta haci nan mes culpabel di violencia domestico. Ora polis wordo yama, y por mira cu abuso fisico y/of destruccion a wordo cometi, cu polis por aresta y husticia por persigui e abusador cu of sin denuncia di e familiar victima.

Husticia mester por protehe e victima, sea cu e ta famia of no, sea cu e ta dependiente di e abusador of no. Pasobra na fin di dia, famia unda violencia y agresion ta pan di cada dia, sigur ora tin mucha memey, tambe merece di wordo protehi”, Parlamentario Desiree Croes a declara.

